

## HE TUHITUHINGA

I NGA MAHI A TE HUI O TE HAHI MAORI O TE TAKIWA O TURANGA, O TE TAKIWA HOKI O TAURANGA, I WHAKAMINEA KI TE KAHA I TE 8 O NGA RA O TIHEMA, 1890.

NO te 7 o Tihema i mine ai nga tangata o te Hui me te tangata whenua ki te karakia, ki te Poho-o-Tukaki: e 28 i tango i te Hapa a te Ariki; i puta hoki te kohikohi o te Ohaohatanga, £1 8s 1d, mo te perehitanga i nga Mahi a te Hui.

No te 11 o nga haora i te awatea, i te 8 o Tihema, ka tae nga tangata ki taua whare; karangarangatia ana nga ingoa, me te whakao ano enei:—

MINITA, o te Takiwa o Turanga: Te Wiremu, Atirikona, Revs. Mohi Turci, Rutene Te Aihu, Te Wiremu, H. W., Hone Waitoa: O te Takiwa o Tauranga: Revs. Te Manihera Hori, Te Kutia Wiremu, Te Pencha Pererika.

MANGAI REIMANA, o te Takiwa o Turanga: Ahipene Rangi, Rutene Te Arahi, Hori Tohungia, Hirini Te Wakakino, Wiki-riwhi Te Piri, Epeniha Tamaauahi, Te Irimana Houturangi, Te Hati Houkamau: O te Takiwa o Tauranga: Hohepa Karapaina, Hemi Te Kani, Wiremu Tamahaua, Renata Pakipaki, Te Waaka Tuteranginoti, Te Wetini Taku, Herewini Nohowaka, Tamati Te Rangimaewa, Ratima Te Awekotuku.

He kore no te Pihopa e tae mai i riro ai ko Te Wiremu Atirikona hei Tumuaki; ka kiia hoki e ia kua tu te Hui, ka timataia te mahi ki te Inoi. Muri iho ka whaikorero ia ki te Hui.

## WHAI-KORERO A TE TUMUAKI.

E hoa ma, e nga Minita, e nga Mangai o te iwi; He raruraru no te Pihopa ki etahi o nga mahi o te Pihopatanga i kore ai e ahoi te tae mai ki tenei Hui, koia i kiia ai e ia, ko ahau hei whakakapi mona.

Tetahi mea manawareka o tenei huihuinga o tatou, ko te apititanga o nga Hui e rua, o te mea tawhito, o te mea hou. Ka pai te nuinga haeretanga o tenei mahi ki te pito whakararo nei: ma konei hoki, ki te manaakitia e te Atua, ka tupu hou ake ai te Hahi i nga wahi kua ururuatia. He mea tenei e hiahiatia nuitia ana i enei tau ka maha nei; he take whakawhetai hoki ma tatou inaianei te nekehanga ake o te Hui hou ki te ahua pakari. Hei muri nei, me whakakaha tatou katoa, tetahi i tetahi, me te inoi ano ki te Atua kia manaakitia nuitia e ia tenei mahi a tatou.